

MSTAG/SONNTAG, 18./19. SEPTEMBER 1976

Herbstfest en der City

„Bärjer macht euch off die Socke“
stieht gruß en der Zeidung dren,
loßt euch von dem Herbstfest locke
do get et recht vill zo sehn!

Zirka 70 Attraktionen
hält die Stadt fier euch bereit.
Dä Besooch soll sich jo lohne,
et beginnt en scheene Zeit!

Kowelenzer Herbstfestwoche
zehjen sich von Stroß zu Stroß.
Et wierd net zovill versproche
en dem Stadtkern es wat loß!

Bleift an Haus on Herd net klewe,
Herbstwoche verginn su fix.
Brengt hei en die „City“ Lewe,
ohne Publikum laift nix!

Onse Stadtkern heißt jetzt „City“
brummt dä Schängel vur sich hin...
Doch et Lißje, genannt „Diddi“
kann dat Wort noch net verstinn.

„Dat es widder su en neue -
Fimmel, säht dä Schang off Platt,
„City“ sein die Ennereie -
von der scheene, gruße Stadt“!!

Katharina Schaaf

18. Sept. 1976